

Visoki predstavnik se sastao sa članovima parlamenta hrvatske nacionalnosti

Visoki predstavnik, Wolfgang Petritsch, danas se sastao sa Mariofilom Ljubićem, Mirom Grabovcem Titanom, Zdenkom Vukićem i Markom Amidžićem, zastupnicima HDZ-a u Zastupničkom domu BiH. Sastanak je održan kako bi članovi parlamenta sa visokim predstavnikom razgovarali o pitanjima koja se tiču njihovog biračkog tijela.

U toku sastanka, visoki predstavnik i četiri zastupnika razgovarali su o najboljem načinu promicanja političkih interesa Hrvata u BiH, u okviru pravnog i ustavnog uređenja Bosne i Hercegovine – što je jedini kontekst u kojem se interesi bosanskohercegovačkih Hrvata mogu efikasno ostvarivati.

Visoki predstavnik je istakao da su pomenuti članovi parlamenta u posljednjih nekoliko mjeseci konstruktivno učestvovali u radu Zastupničkog doma BiH. “Vi ste ozbiljno shvatili svoju odgovornost kao izabrani predstavnici hrvatskog konstitutivnog naroda,” rekao je. Dodao je da drugi članovi HDZ-a nisu pokazali isto mjeru razumnosti, te da su na taj način izdali svoje birače. “Sve dok je vođstvo vaše stranke onakvo kakvo je sada, položaj i zaštita interesa bosanskohercegovačkih Hrvata su oslabljeni,” rekao je visoki predstavnik. “Ti ljudi – a njih je samo nekolicina u HDZ-u i među Hrvatima BiH – su oni čije djelovanje može ugroziti položaj bosanskohercegovačkih Hrvata, a samim tim i Bosnu i Hercegovinu. Njima nije stalo ni do hrvatskog naroda niti do Bosne i Hercegovine,” rekao je visoki predstavnik Wolfgang Petritsch.

Među temama o kojima se razgovaralo bila je budućnost Bosne i Hercegovine i bosanskohercegovačkih Hrvata, provedba odluke Ustavnog suda o kontitutivnosti naroda BiH u oba entiteta, te napredak koji je postignut u radu entitetskih ustavnih komisija.

Visoki predstavnik je naglasio da se BiH može dalje razvijati samo uz puno učešće Hrvata Bosne i Hercegovine. On je još jednom izrazio svoje razočarenje činjenicom da je HDZ nekoliko puta odbio da učestvuje u radu Ustavnih komisija kada su one osnovane, u proljeće ove godine. Za razliku od njih, bosanskohercegovački Hrvati iz Alijanse za promjene aktivno učestvuju u radu ovih komisija. Ovaj proces će, između ostalog, po prvi put nakon potpisivanja Daytonskog sporazuma, dovesti do djelotvorne i ozakonjene zaštite prava bosanskohercegovačkih Hrvata u Republici Srpskoj. "Siguran sam da će te ustavne promjene ojačati položaj Hrvata u BiH," rekao je visoki predstavnik.